

Asociacion di Astronomia Arubano Astro Research a cumpli 10 año di existencia

ORANEJSTAD - Dia 21 di december 2003 ultimo e asociacion di astronomia arubano esta Aruba Astro Research a cumpli 10 año di existencia. Tabata na 1993 cu Aruba Astro Research bou quia di su fundador y presidente Marcos Bislip hunto cu otro personanan den nos comunidad a lanta e organizacion di astronomia local y cu despues na 1998 a bira e prome organizacion arubano cu ta wordo acepta unanimamente pa e miembronan di e organizacion mas grandi y reconocí mundialmente esta Astronomical League (AL) como miembro. Tambe ta bon pa menciona cu Aruba Astro Research ta e prome organizacion fuera di teritorio Norte Americano cu a bira miembro di AL. Esaki danki na Ken Willcox en felis memoria, kende a haci posibel cu awe Aruba ta e prome organizacion cu por a bira miembro di e Federacion di Asociacionnan di Astronomon Profesional y Amateur di Merca y Mundial esta Astronomical League. Na 1998 den Luna di juli directiva nobo di Astronomical League ta presentá un mocion nobo na e asamblea general na unda ta pidi pa haci cambio den e statuto di e asociacion Astronomical League y ta permiti pa prome biaha cu organizacionnan den exterior por forma parti y alaves bira miembro oficial di e asociacion Astronomical League.

Aparte di esey Marcos Bislip como presidente di Aruba Astro Research y astrónomo arubano ta haya pa prome biaha den historia di astronomia di Aruba derecho di voto den e consoho di miembronan internacional y tambe participacion den e asamblea general di e asociacion Astronomical League. Esaki ta prome biaha cu un Arubiano como astrónomo y representando pais Aruba den e tereno di astronomia ta haya derecho di voto den e consoho di miembronan internacional.

Durante 1997 pa 1998 e asociacion Aruba Astro Research tabata e unico organizacion no gubernamental cu a guia e astronomonnan y científiconan di exterior pa cu e preparacion di e evento historico di dia 26 di februari 1998 aki na Aruba cu ayudo di oficina di turismo, departamento di salubridad, como tambe e comision nacional di eclipse pa cual presidente di Aruba Astro Research, Marcos Bislip, a representa ciencia di astronomia oficialmente aki na Aruba den e comision di gobierno.

Historia:
Dia 21 di december 1993 Marcos Bislip hunto cu un grupo di amigo, conocirnan y personanan cu ta stima e tereno di astronomia aki na Aruba a dicidi di funda Aruba Astro Research y na unda como presidente di e organizacion a keda instala Marcos Bislip kende a wordo re-eligi dos biaha pa un periodo di cinco año esta for di 1993 te cu 1998 y di 1998 te cu 2003. Na año 2004 e organizacion

Aruba Astro Research lo conoce un presidente y posibelmente un directiva nobo. Manera ta conoci Marcos Bislip ta e fundador y motor principal tras di e organizacion di astronomia arubano, awe esaki a bira realidad, danki na su famia specialmente na su tata Marco Bislip, como tambe na un grupo di amigo, conocirnan y personanan den nos comunidad cu tin aprecio y amor pa e tereno di astronomia cu a sa di yuda e asociacion Aruba Astro Research den temponan bon y malo pa asina e ciencia di astronomia por a crece y bira grandi aki na Aruba.

Awe e asociacion Aruba Astro Research por mira atras ariba un logro grandi na unda e asociacion por a celebra su 10 año di existencia trahando ariba e tereno di astronomia local como tambe internacional na Aruba.

For di 1993 te cu na 1997 Aruba Astro Research tabata conoci solamente localmente pero asina mes mester a lucha hopi pa e por wordo respeta y reconoci como un instancia local.

Tabata na 1998 te cu e dia di awe cu Aruba Astro Research ta reconoci internacionalmente, como tambe localmente pa cu e ciencia di astronomia aki na Aruba.

Na 1999 Aruba Astro Research tabata e prome y unico organizacion di astronomia di Aruba cu a participa na e eclipse total di solo na Kastamono na Turkia den persona di Marcos Bislip den calidad di presidente di e organizacion Aruba Astro Research.

Aruba Astro Research tabata e unico organizacion den reino hulandes cu tabata presente y cu a saca cara di Hulanda y Aruba durante e eclipse total di solo na Turkia na 1999.

Pero te awe nos por tuma nota cu lastimamente aki na Aruba como tambe den reino hulandes instancianan y personanan cu ta saca cara di tanto Aruba y di Reino Hulandes den exterior mes no ta wordo reconoci manera e mester ta. Pa Aruba Astro Research como organizacion local y internacional di Aruba ta contento toch pa motibu cu e pueblo di Turkia como tambe e autoridadnan di Turkia y Grecia a duna tanto Marcos Bislip como astrónomo y Aruba Astro Research como organizacion un reconocimiento y aprecio pa e bon trabao haci durante e evento di eclipse total di solo, como tambe di parti di e Internacional Working Group on Eclipses di I.A.U. (International Astronomical Union) bou quia di Professor Jay M. Pasachoff.

Un biaha mas a keda demostra cu un yiu di tera, como tambe un organizacion local y internacional di astronomia no ta wordo reconoci pa su propio pais y gobierno, y mas tristo ainda ta cu ni tampoco pa Reino Hulandes.

Na 2000 Aruba Astro Research den estrecho cooperacion cu NASA Marshall Spaceflight Center, NASA Goddard Spaceflight

Center, Astronomical League, NIST, U.S. Naval Observatory, Greenwich Observatory, Institute of Earth Rotation, FUNVISIS, Williams College, NEO Near Earth Object, SOHO & LASCO, NICUFO, The Planetary Society, SETI y Fred Espenak Astrofisico di NASA mihor conoci como Mr. Eclipse y Professor Jay M. Pasachoff di

Williams College y Sr. Ken Willcox en felis memoria, a bin cu e idea pa lanta un centro di observacion chiquito no gubernamental pa asina observa, monitoria, registra y mantene datonan importante di actividadnan astronómicos, cosmológicos, cronológicos, space weather, seguridad espacial, astrobiológico ufológico y astrofísico. E meta principal di e centro di observacion tabata pa haci e conteo di fin di año pa cu e entrada di e Milenio y Siglo Nobo dia 1 di Januari 2001 mirando cu na tur pais na mundo tin un centro di observacion cu ta haci e conteo oficial pa drenta e milenio y siglo nobo.

Dia 1 di november 2000 Aruba Time and Space Observation Center ATSOC a wordo poni den operacion y te ainda ta cai bou di e asociacion Aruba Astro Research.

E centro di observacion a bira hopi conoci pa e conteo di tur fin di año, y centro di observacion ta di vital importancia pa e tereno di astronomia, cosmologia, cronologia, space weather, seguridad espacial, sismologia y polucion y contaminacion di aire na Aruba.

Na e centro di observacion ta registra y ta archiva tur evento tanto di astronomia, sismologia y medio ambiente cu ta di hopi importancia pa pais Aruba.

Na 2001 e centro di observacion ATSOC y Aruba Astro Research a lanta un grupo especial cu ta carga e nomber di "The New Millennium Group 2001" pa asina saca foto y haci filmacionnan y registra e eventonan mas importante durante henter 2001 pa motibu cu 2001 ta ser considera e año mas historico di e comienso di e Tercer Milenio y Siglo 21.

Na año 2003 Aruba Astro Research na luna di Mei a experiencia un bunita eclipse total di luna y na unda cu Aruba Astro Research pa medio di Marcos Bislip y Brandon Whittaker experto norte americano y den compania di pueblo di Aruba hunto cu e prensa local a saca fotonan masha bunita di e evento celestial. Dia 27 di augustus 2003 Aruba Astro Research bou guia di Marcos Bislip, Brandon Whittaker y Soraya a wordo sorprendi pa un gran multitud di persona cu a sali ariba caya y bin apoya e miembronan di Aruba Astro Research durante e anochi historico aki. Eventonan durante añanan:

Aruba Astro Research a cubri e siguiente actividadnan: Na 1996 e pasada di e Cometa Hyakutake, Cometa Hale Bopp na 1997, Eclipse Total di Solo dia 26 di februari di 1998, e yobida espectacular di

meteoronan Leonid na Aruba dia 17 y 18 di november di 1998, dia 18 di november di 2001, e ultimo Eclipse Total di Solo di e segundo Milenio y Siglo 20 na Kastamono Turkia dia 11 di augustus 1999, año 2000 Celebracion di Hubileo di Cristianismo, e cambio di Milenio y Siglo Nobo dia 1 di januari 2001 na Mundo, e prome Eclipse Parcial di Solodia 14 di december 2001 visibel na Aruba, dia 27 di februari 2002 e Luna yen mas briyante di 2002, dia 25 di maart te na final di April di año 2002 Cometa Ikeya-Zhang tabata visibel aki na Aruba. Den luna di April 2002 alinacion di planetanan Venus, Marte, Saturno y Jupiter, dia 15 di mei 2003 Eclipse Total di Luna y dia 27 di augustus 2003 e acercamiento di Planeta Marte cu Planeta Tera, dia 28 di october 2003 Explosion y Erupcion ariba Solo. Futuro y adelanto tecnologico:

Dia 26 di februari 2004 Aruba Astro Research lo introduci su Website na mundo henter.

Dia 21 di juni 2004 Aruba Astro Research su Banco di Data lo wordo conecta 24 ora cu tur instancianan di astronomia rond di mundo, haciendo asina e red di banco di data mas grandi y amplio.

Actualmente e Banco di Data ta conecta 24 ora cu NASA y algun instancia y organizacion den exterior. Dia 21 di september 2004 lo introduci un Website special pa studiantenan y publico general. Tambe durante 2004 lo pone un Banco di Data ariba nivel local den funcion specialmente pa instancianan local manera Biblioteca Nacional di Aruba, Oficina di Turismo, Camera di Comercio y Archivo Historico entre otro. Un die plannan mas grandi di Aruba Astro Research ta pa construi un Observatorio y un centro di observacion mas grandi y mas sofisticada. Aruba Astro Research ta conta cu algun ekiplo basta sofisticado entrenan Camera pa haci filmacion, saca fotonan digital, como tambe camera pa saca fotonan cu ta usa negativo cu speed hopi halto y special tambe ta conta cu dos telescopio basta bon, un sistema di GPS basta sofisticado e-mail website special pa comunicacion local y internacional y alaves usando e sistema @mas.aw y @digitextaw.com, tambe ta dispone di un sistema pa capta señalnan di meteoronan cu ta drenta atmosfera esta RAMOS Radio Meteor Observation System y VIMOS Visual Meteor Observation System. Resientemente dia 13 di december ariba fecha di nacemento di Marcos Bislip, Aruba Astro Research y Marcos Bislip a ricibi pa 5:17 di marduga e prome transmision di informacion relaciona cu yobida di meteoronan Geminid directo via su telefon celular usando e sistema di @mas.aw di Setarnet.

E techniconan di Aruba Astro Research, ATSOC, Setar N.V., Yahoo.com y NASA MSFC a haci esaki posibel cu Marcos Bislip y ATSOC por ricibi informacionnan directo via telefon mobiel.

Na 2004 Aruba Astro Research hunto cu e otro dos otro organizacionnan e team specialnan ariba tereno di trabao leu for di linianan di telefon y coriente esta na un sitio remoto na Aruba lo bai usa dentro di poco un sistema di comunicacion wireless, pa asina transmiti datanan importante pa e centro di observacion y tambe pa exterior usando e servicio di companianan local y como tambe usando un sistema mas directo den caso cu e servicio di e compania di companianan local bay for di servicio.

Gradecimento:

Durante año cu a pasa Aruba Astro Research a conoce diferente miembronan, personanan y instancianan cu a yuda e organizacion bira grandi y importante den nos comunidad. E miembronan, personanan y instancianan cu a haci esaki posibel ta:

Ruben Trappenberg, Karel Kock, Ron Van Kessel, Mundo Albus di ATA, Mirna Jansen di ATA.

Jimmy Oduer di UNESCO ARUBA, CaribeMedia, Internet Cafe Sr. Robert Dubero, Nilton Lacle di Diario, Maritza Faroy Benjamin Romero di Bon Dia Aruba, Esmeralda v/d Woude di Sonesta Hotel, Tele Aruba, ATV Canal 15 Analisa Gesterkamp, Stanley Arends Canal 90, Erin Croes, Ruben Garcia, Ivan Kelly di Magic FM, Edwin Tromp di RBT y ex-Minister Lili Beke-Martinez kendenan a haci posibel cu Aruba Astro Research como organizacion local y Sr. Marcos Bislip como e unico astrónomo arubano por a participa na evento di eclipse di solo na Kastamono Turkia na 1999 cual tabata e ultimo di siglo 20 y di e segundo milenio cu a termina.

Na 2000, 2001, 2002 y 2003 radio emisoranan manera Radio Magic FM, Radio Galactica y Radio Top 95 FM hunto cu Matutino Diario y Bon Dia Aruba a coopera pa asina tur año e conteo di fin di año por a bira parti di nos customer, tradicion y cultura. Tambe esaki ta posibel danki na Sr. Roberto Geerman cu durante 25 año a sa di conta e ultimo minuutnan y secondenan cu falta pa año termina, y ta habri año den studio di radio cu e pueblo di Aruba. Aruba Astro Research pa medio di su directiva y den nomber di e presidente y fundador Marcos Bislip kier a gradici prensa di Aruba specialmente Diario, Bon Dia Aruba, Amigoe di Aruba, Tele Aruba, ATV, Radio Galactica, Radio Magic FM, Radio Top 95 FM, Radio Cool 100.9 FM.

Radio Mi FM, Hit 94 FM, Radio Canal 90 FM y ECA News pa nan apoyo.

Awe Aruba por ta orguyoso di tin su propio asociacion astronómicos local y internacional.

Aruba Astro Research por wordo contact na telefon 2979644559 of tambe por manda e-mail na arubaastrosearch@yahoo.com